

Soujgih Doiq Siujhagseng Yingyangj Lai

☐Banh Cuhlenz/班珠莲

Youq ngeihcib bi gaxgonq, soujgih cij yungh daeuj dwk denva yawj seizgan. Hoeng, doeklaeng cinwngz soujgih byaij haeuj ndwenngoenz raeuz, gij gunghnwngz de yied daeuj yied lai, ndaej yawj densi denyingj、ingjsiengj、yawj faenzcieng、dwk youzhi、hai ci byaij roenz seiz aeu daeuj daujhangz daengjdaengj, gij yunghcawq cinwngz soujgih gangj mbouj liux, hawj gyoengqvunz fuengbienh gig lai. Seizneix gyoengqvunz cungj dwg seizseiz gaem soujgih, baez ndaejhoengq couh dawz soujgih daeuj guhcaemz, mizseiz yawj haeujyinx le lumz gwn haeux roxnaeuz guhhong dem.

Vunzhang seizseiz loengh soujgih, lwgnyez raen le hix siengj gaen loengh, yied loengh yied yinx, gij haihcawq gig lai.

Seizneix haujlai lwgnyez sam seiq nienzgaep couh daiq gingqda lo, dingzlai dwg aenvih loengh soujgih lai deng dagaenhyanx. Lwgnyez baez loengh soujgih couh mboujguenj geijlai nanz, vanzlij mizmbangj gyanghwnz caj banlaux ninzndaek le caiq hwnqdaeuj caeg lumhlaep loengh soujgih.

Ngeih dwg gij soujgih sibinz dinj daiqdaeuj sengmingh yungyiemj. Seizneix gij sibinz dinj hwnghat gig vaiq, neiyungz cawz le miz gij cizgiz yingyangj, lijimiz mbangj cozbini neiyungz famh daengz daudwz daejsienq bouxvunz, gyoengq siujhagseng lij caengz faen ndaej ok deng loek, gag guenj naengzlij mbouj ak, youq ndaw vangjloz bya lungz doxcab de, lainoix cungj deng yingyangj, gyoengqde gig ngaih couh maezmwnh ndawde.

Mbangj boux banlaux “fatbag ” vih ingj sibinz, lingx lwgnyez bae guh gij dungcoz yungyiemj roxnaeuz hwk vunz haenx. Lumjbaenz, miz boux daxboh nengh gen lwgnyez fan dangqnaj fan baihlaeng roxnaeuz venj youq gwnz mbaq, gij dungcoz neix dawz lwgnyez guhcaemz, seiqhenz mbouj miz saek di ancienz baujjang. Boux banlaux mbouj miz gij eiqsik ancienz yienghneix dauqcawq miz, lumjbaenz youq ngoenz roengz siet yaeuh lwgnyez bae riz gij bing congheung, yawjraen diuzlinx deng nem youq gwnz congheung lij riu haha……Gyoengqde leihyung lwgnyez daeuj guh—angq caeuq comz lwgda gyoengqvunz, dwg doiq

lwgnyez sengmingh ancienz mbouj fucwzyin, yungzheih hawj lwgnyez gaen rumz youq gwnz ndang daegnuengx dahnuegx roxnaeuz doengzhag ciuq guh, yæk cauhbaenz engq lai lwgnyez deng sienghaih.

Sam dwg yingyangj gij swhsiengj siujhagseng. Sibinz dinj miz haujlai rox son lwgnyez hag vaih, lumjbaenz lij iq couh mbouj doegsaw ok sevei caengz baenz vunzhang couh aeyah haqvunz seng lwg; ngoenzngoenz mbouj guhhong cangndang gyaeuget youq gwnz vangjloz hai cizbo; ciengq go roxnaeuz gai doxgaiq daeuj aeu ngaenz; lij miz mbangj sibinz dwg yienghlawz son vunz bae yaeuh vunz. Cungj sibinz yakrwix neix doiq siujhagseng gauhnenzgiz haenx daeuj gangj, yingyangj gig yakrwix, doiq swhsiengj gensez gyoengqde lumjbaenz cadan bauca itiyengh haenqrem, gij swhsiengj mbouj cingq caeuq gij neiyungz yungyiemj hawj vunz yousim.

Bet goujcib nienzdaih mwhhaenx gij lijsiengj gyoengq lwgnyez iq cungj dwg gij maqmuengh gyaeundei, aiq dwg gingcaz、canghyw、lauxsae, hix aiq dwg canghranz、gohyozgyah daengj boux bingzciengz miz gungyen hungmbwk haenx. Hoeng, seizneix siujhagseng lwnh daengz lijsiengj seiz, gij dapanq gyoengqde dwg cujboh guhcaemz、cujboh cangndang、yenjyenz daengj doengh cungj hangznieb hong mbaeu ngaenz lai neix. Mwhneix vangjloz hwnghat gig vaiq, daiq daeuj fuengbienh doengzseiz, hix miz daihliengh saenqsik roemx haeuj saedcej raeuz daeuj. Ceiq youqgaenj dwg gij sibinz mbouj yungh roengzrengz guh hong couh ndaej yiengjsouh, ndaej gwn ndei youq ndei haenx. Cungj sibinz neix hawj lwgnyez miz cungj swhsiengj “guh cujboh mboujdanh ndaej guhcaemz, lij gig canh cienz” “doegsaw mbouj miz yungh, cijaeu gou gyaeundei、gou baenzsau baenzmbauq, couh ndaej ra boux miz ngaenz, couh ndaej gvaq cungj saedcej vuenyungz”……

Seiq dwg doiq gij hagsib siujhagseng miz yingyangj. Gyoengq siujhagseng ukgyaeuj lij oi, doiq seiqgyaiq gak cungj gak yiengh geizheih dangqmaz. Doujyinh、gvaisouj daengj APP sibinz

dinj hwnghatdwd, hai aen dou seiqgyaiq moq hagseng, gij doxgaiq ndawde singjsien mizyinx, doenghduz dwggvaez、doxgaiq guhcaemz、dozveh lai yiengh、gojgaeq ndeiri…… Gij neiyungz haenx supyinx siujhagseng hag guh, gyoengqde cungj naemj lumj cujboh itiyengh, couh ngoenzngoenz nyaengq “cozbini”. Miz lauxsae naeuz hagseng swheij mbouj guh cozyez, yienzaen gingqyenz dwg youq ndaw doujyinh yawj vunz gai doxgaiq, cozyez guh mbouj gib. Lij miz dah iq ndeu, hwnjdangz couh loengh fwngz mbouj dingz, lauxsae baez cam dwg hag doujyinh diuq foux. Gij saeh neix couh yawj ndaej ok soujgih yingyangj hagsib gig daih, gij swhsiengj gyoengqde caemh ngaiz nyauhlenh, gyoengqde bienq dwk simfouz、simnyap. Sojlaiz dazyinx gyoengq siujhagseng hableix yungh soujgih, dwg gij saeh ceiq youqgaenj seizneix.

Doiq dangqnaj soujgih yingyangj siujhagseng neix, lauxsae、banlaux caeuq sevei sam fuengmienh caezsim lienzhab hwnjdaeuj, ra ok dauq fuengfap cingqdeng caemhcai cienzmienh ndeu, dajcauh aen seizdaih moq vangjloz huzndei、gyaeundei, vih siujhagseng majhung cauh ok aen vanzging ndangcangq ndeu.

Daem Ding

☐Niuz Yihhoz/牛依河

Youq ndaw denyingj, geij boux bing,
Hawj gyoengq canyouj ngamq dai bae daengj bei,
Diuzdiuz faex mbouj miz mingzcoh,
Deng daem haeuj ndaw namh,
Dong dong dong, gij sing de,
Hawj gou ngeix daengz mbat daem ding ndeu,
Gou baez yungh rengz, ding daem mbieng le,
Fagcuiz daem haenq deng lwg mehfwngz gou,
Gou doq hamz gij get haeuj ndaw bak,
Gij get baez yaepda daj congghoz caemrwg,
Senj daengz ndawsim gou.

Lauxdoengz

☐Moz Lijginz / 磨礼勤

Lij Danenz naeuz: “Mienhciengz gvethoi ndei le, daz song baez caet goemq hwnj mienhciengz, hoi hix mbouj lau fwn buet lo.”

Laujuj fanj buek: “Hoi mbouj nem youq gwnz ciengz, aeu caet goemq hwnjbae, mwngz naeuz hawj gou nyi, ciengz hau neix yungh ndaej geijlai bi?”

Lij Danenz ngoemxngwd.

Laujuj aeu fwngz bae gaeu mienhciengz geij giz, gig byoiq, de seizbienh dawz di ceijna cat bae cat dauq, mba hau faenfaen doek roengzdaeuj, de gyangznaek, ngauz—ngauz gyaeuj, dawz soujgih okdaeuj

dwk denva, cam vihmaz dwg cungj cingzgvang neix. Doiqfueng naeuz dwg nizswjfwj daih yaez lai.

Laujuj dingz denva, doiq daihgya naeuz: “Sou sikaek conx gij hoi ciengz hau roengzdaeuj caez bae, gij lw haenx aeu sauqbaet sauq seuqseuq bae.”

Laujuj caen lumj vuengzdae, cibcuk vuengzmbwk “Vujcwzdenh!” Vangz Gencingh yawj de vunz sang hix mbouj gig sang, aenvih ndang iq raen sang, lumj diuz faexgoenq ndeu, hwnj sang le hwet miz di goz. hix mbouj dwg goz, Vangz Gencingh caen siengj daezsingj de, vuengzmbwk ha, mwngz seizneix ngiengx gyaeuj couh

ndei yawj lo, vunz ndang loz hix ndei yawj, daengxcungq yawj hwnjbae seuqsaw sienhsoh, cungj vunz neix lauxsaed bonjfaenh, hoeng banhsaeh miz di ngaizbanj. Naj Laujuj najmax, naengbak iq, bwnda na, lwgda lumj da yuih. Vangz Gencingh naemj daengz raennaj ngoenz daih’ it Laujuj mbouj baenzneix yak ha, vunz daih fukcab lo!

Lij Danenz lumj giuz laeuhheiq bejbyadbyad, maqmuengh henzndang miz aen congheung ndeu sikaek ndonj haeujbae!

Cinz lauxbanj naeuz: “Gvaq cibhaj doengh bae yawj.”

Daihgya naengh dendih roengzdaeuj gvaq cibhaj doengh bae,

Laujuj naenx dendih hwnj cib laeuz bae, de cigsoh bae yawj seiq aen ranz congheung song henz, youh byaij roengz gouj laeuz bae, yawj caez haeuj dendih, Cinz lauxbanj caeuq Vangz Gencingh hix gaenriengz roengz rock laeuz, yawj caez youh yawj mienhciengz veiswngghen, raen ciengz dumz hoi mbouj bok roengzdaeuj, de aeu ribfwngz bae gaeu ciengz dumz haenx, gig geng. Vangz Gencingh siengj naeuz, mwngz dwg Vujcwzdenh ce ribfwngz congheung ndeu raez couh gvat hoiciengz okdaeuj. Hoeng Vangz Gencingh mbouj gamj ok sing, Laujuj youh ra ceijna daeuj nyaen baenz ndaek ndeu okrengz bae cat ciengz, cat mbouj ok mba, giz cat ce miz di riz uq, Vangz Gencingh riu naeuz: “Baugau vuengzdae, ciengzhoi neix gou aeu gihgai dajmozgih cij cat ndaej doengh.” (17)

